



Til: Stjórnar SSH

Efni: Fjölsmiðjan – endurnýjun þjónustusamnings

Málsnúmer: 1501007

Hjálagt er tillaga að endurnýjuðum þjónustusamningi aðildarsveitarfélaga SSH og Fjölsmiðjunnar sem koma þarf í stað þess samnings sem gerður var í febrúar 2014, upphaflega til eins árs, en síðan framlengdur í þriggja og féll úr gildi í lok mars.

Samningurinn er efnislega óbreyttur, að öðru leyti en því að lagt er til að árlegur þjónustustyrkur sveitarfélaganna skv. 5. grein samningsins, kr. 9.300.000,- verði uppfærður til samræmis við verðlagsþróun og fylgi á samningstímanum verðlagsbreytingum í samræmi við breytingar á vísitölu neysluverðs.

Lagt er til að samningurinn verði nú gerður til þriggja ára, en með endurskoðunarákvæði ef sú vinna stjórnar sem gerð er grein fyrir hér að neðan leiðir til þess að gera verði breytingar á starfsemi Fjölsmiðjunnar áður en samningstíminn er útrunninn.

1. Aðdragandi

Sveitarfélögin á höfuðborgarsvæðinu hafa um langt skeið komið að rekstri Fjölsmiðjunnar og nýtt þau úrræði sem Fjölsmiðjan býður vegna ungmenna á aldrinum 16-24 ára sem flosnað hafa upp úr námi og/eða ekki náð fótfestu á vinnumarkaði.

Samstarf sveitarfélaganna og Fjölsmiðjunnar grundvallast í dag á þjónustusamningi sem gerður var í febrúar 2014. Samningurinn var gerður til eins árs og í honum er sérstakt ákvæði um aðgerðir til að styrkja bæði faglega og fjárhagslega undirstöðu starfsemi Fjölsmiðjunnar. Þeirri vinnu skyldi lokið á samningstímanum

(sjá meðf. afrit af samningi sveitarfélaganna og Fjölsmiðjunnar frá 3. febrúar 2014)

Samningurinn hefur síðan þrívægis verið framlengdur til eins árs í senn vegna dráttar á úrlausn þeirra viðfangsefna sem tilgreind eru í 3. grein samningsins (sjá hér að neðan)

2. Aðgerðir til breytinga á starfsemi Fjölsmiðjunnar

Sá hópur sem tilgreindur er í 11. grein ofangreinds samnings hóf strax úrvinnslu þeirra verkefna sem þar eru tilgreind. Tekin var saman ítarleg greining á rekstri og fjárhagsstöðu Fjölsmiðjunnar, einkanlega í ljósi þess að starfsemin Fjölsmiðjunnar var um of háð sjálfsafletekjum sem m.a. dró úr getu til að ástunda markvissa þjálfun skjólstæðinga og eiginfjárstaða Fjölsmiðjunnar var á þessum tíma neikvæð.



Starf hópsins beindist því að þremur meginþáttum til að breyta þessari stöðu og á stjórnarfundi SSH 1. desember 2014 kynnti þáverandi stjórnarformaður Fjölsmiðjunnar meginhugmyndir hópsins um aðgerðir til styrkingar á fjárhagsgrundvelli og aðgerðir til eflingar á innra starfi.

Lykilatriði í ofangreindum aðgerðum fólust í gerð námsskrár með skilgreiningum á áföngum og námseiningum, sem svo aftur var forsenda þess að hægt væri að ræða við Menntamálaráðuneytið um viðurkenningu á þeirri þjálfun og námi sem fram færi í Fjölsmiðjunni sem hluta af námi á framhaldsskólastigi og um leið viðurkenningu á greiðsluþátttöku ríkisins með sama hætti og almennt gildir um framhaldsskóla.

Námsskrár, lýsingar og skilgreiningar eininga voru tilbúin fyrri hluta árs 2015 og þá hófst aðlögun á innra starfi Fjölsmiðjunnar til samræmis við þessar lýsingar. Samhliða var unnið í viðræðum við Menntamálaráðuneytið um viðurkenningu á námsskránni og mótun samnings vegna greiðslna ráðuneytisins vegna nemenda á framhaldsskólaaldri.

Af ýmsum ástæðum, m.a. vegna undirbúnings að og síðar flutnings verkefna frá Menntamálaráðuneyti til Menntamálastofnunar dróst von úr viti að hægt væri að ljúka þessum samningi. Að mati þeirra sem stóðu að vinnu við endurskipulagningu starfsemi Fjölsmiðjunnar var þessi samningur grundvöllur og forsenda annarra aðgerða til eflingar á starfsemi og fjárhag Fjölsmiðjunnar og því hafa aðrar aðgerðir beðið eftir niðurstöðu þessarar vinnu.

3. Núverandi staða.

Úrvinnsla á framangreindum þáttum stendur þannig í dag:

a) Innra starf Fjölsmiðjunnar:

- Fyrir liggur skilgreind námsskrá og námseiningar – nemendur á framhaldsskólaaldri fara nú í gengum ákveðið kjarnanám og valeiningar og fá viðurkenndar námseiningar sem gagnast þeim í framhaldsskólakerfinu.
- Fjölsmiðjan er nú viðurkennd í námsvali framhaldsskólanna og nemendur geta skráð sig þar til náms í gegnum vef ráðuneytisins.
- Menntamálaráðuneytið greiðir í dag til Fjölsmiðjunnar ákveðna upphæð fyrir hvern nemanda á framhaldsskólaaldri í samræmi við námsframvindu og einingar. Ekki hefur þó tekist að ljúka að fullu samningum við menntamálastofnun vegna þessa.

b) Fjárhagsleg staða Fjölsmiðjunnar:

- Umtalsverð breyting hefur orðið á eigin fé Fjölsmiðjunnar frá árinu 2013, bæði vegna afskriftar á innri skuld við sjávarútvegsdeild Fjölsmiðjunnar sem lögð var niður, sem og vegna betri rekstrarafkomu undanfarinna 3 ára. Eigið fé var neikvætt um liðlega eina milljón kr. í árslok 2013, en var í árslok 2016 14,6 m. króna. Rekstrarafgangur ársins 2016 var tæplega 2 m. króna.

c) Áframhaldandi vinna við styrkingu innra starf og fjárhags:

Stjórn Fjölsmiðjunnar hefur ákveðið að vinna á næstu mánuðum og misserum að eftirfarandi til að skjóta enn styrkari stoðum undir rekstur og fagmennsku í innra starfi:



- Afdrifakönnun eldri nemenda í því skyni að fá fram skýra mynd af árangri starfsins og greina hverju starfið hefur skilað til lengri tíma.
- Stefnumótunarvinna stjórnar, starfsmanna og samstarfsaðila nú á vormánuðum til að fá fram skýra stefnu og aðgerðaáætlun sem tryggir enn markvissara starf og skarpari framtíðarsýn fyrir starfsemina og eftir atvikum áherslubreytingar sem og aðlögun að núverandi þörfum notenda.

Stjórnin stefnir að því að þessari vinnu ljúki á þessu ári, en telur að skynsamlegt sé að núverandi samningur verði endurnýjaður til næstu þriggja ára meðan að unnið verði úr niðurstöðum ofangreindrar vinnu og þeirra breytinga sem hún mögulega leiðir af sér.

Virðingarfyllt,

Páll Guðjónsson
framkvæmdastjóri SSH